

Cas pli complexs per las dretgiras

Il cussegl grond ha tractà ils rapports da gestiun

■ (anr/rgd) Il parlament grischun ha sa laschà infurmar davart las dretgiras chantunalas enfin a la Viafier retica. Tematisada è vegnida la previsibla mancanza da persunal dal fatg. Er a l'entschatta da la sessiun «extra muros» ad Arosa ha il parlament grischun prendì sco usità per la sessiun da zercladur enconuschientscha dals uffizis e da las interpresas cun partizipaziun dal chantun. Sco emprim ha il deputà *Alessandro Della Vedova* (pcd, Poschiavo) fatg attent sin l'augment da lavur tar la dretgira chantunala. Il motiv èn la complexità e quantitat dals cas, cunzunt en connex cun la APUC / KESB. Il cussegl grond ha approvà quest rapport senza cuntravusch.

En occasiun dal tractament dal rapport dal Center da furmaziun per la sa-

nadad ed ils fatgs socials (CFSS) ha menziunà *Christina Bucher-Brini* (ps, Cuira) la problematica da la mancanza da persunal spezialisà. Cussegljer guvernativ *Martin Jäger* ha rendì attent al fatg allegraivel da la gronda cumpart da students grischuns a la CFSS. «Quai en cuntrast cun la Scol'auta spezialisada per tecnica ed economia, che ha ina cumpart da students d'ordaifer il Grischun da 77 pertschient», ha ditg Jäger.

Laud per Banca chantunala e Viafier retica

Dal rapport da gestiun da la Banca chantunala ha il parlament grischun pudì prender enconuschientscha allegraivla. «La cumbinaziun da l'auta quota d'agens mezs da 18,9 pertschient cun la garanzia

statala dal chantun Grischun procura per in bun rating al marchà», ha explicrà *Livio Zanetti* (pcd, Tschintg Vitgs). Er la Viafier retica ha già in bun onn da gestiun 2014 cun in gudogn da 186 000 francs. Ils passa diesch milliuns passagiers n'han betg stuì sa grittentar savens da retards. «La quota da trens punctuals u cun in retard da sut tschintg minutas munta a 96,3 pertschient», ha dit il pleader da la cumissiun da gestiun da la VR *Daniel Blumenthal* (pcd, Lumnezia). Ina pretensiun generala en connex cun ils rapports da gestiun ha fatg *Peter Peyer* (ps, Trin). El ha pretendì dapli trasparenza tar las indemniziuns per ils commembers dals cussegls administrativs da las instituziuns cun partizipaziun dal chantun.



Ils dus suppleants deputads al cussegl grond (da san.) *Clemens Berther* (pcd, Cadi) e *Benno Bossi* (pcd, Alvaschagn) èn vegnids saramentads.